

PEMBERITAHU PERTANYAAN DEWAN RAKYAT

PERTANYAAN : **LISAN**
DARIPADA : **DR. CHE ROSLI BIN CHE MAT [HULU LANGAT]**
TARIKH : **16.6.2014**
SOALAN :

Dr. Che Rosli bin Che Mat [Hulu Langat] minta **MENTERI PENDIDIKAN** menyatakan usaha yang dibuat dalam meningkatkan sahsiah pelajar-pelajar sekolah dan Institusi Pengajian Tinggi bagi mengatasi gejala sosial yang berleluasa.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha meningkatkan sahsiah pelajar melalui program kurikulum dan kokurikulum. KPM juga mempunyai program khusus bagi membendung gejala sosial, di antaranya program jati diri. Melalui program ini, pelajar yang dikenal pasti berisiko akan diberi kesedaran untuk melakukan perubahan sikap dan tingkahlaku bagi membangunkan potesi diri secara menyeluruh. Program ini dirancang untuk membantu pelajar sasaran mengenal diri, penghargaan diri dan membina matlamat diri.

KPM juga bekerjasama dengan Kementerian dan agensi lain dalam menangani isu gejala sosial. Contohnya melalui Program Remaja Berwawasan , tiga agensi utama telah dilibatkan iaitu Angkatan Tentera Malaysia (ATM) , Polis DiRaja Malaysia (PDRM) dan KPM. Jabatan Perpaduan Negara dan *1Malaysia For Youth* (1M4U) juga turut memberi kerjasama dari segi pelaksanaan program tersebut. Tujuan program ini adalah meningkatkan disiplin diri supaya menjadi individu yang lebih bertanggungjawab kepada

diri mereka sendiri, keluarga, sekolah, masyarakat dan negara pada masa hadapan. Di samping itu, perkhidmatan Bimbingan dan Kaunseling di sekolah turut memberi fokus utama kepada pembangunan sahsiah dan disiplin murid. Melalui program yang berfokus ini akan dapat merangsang diri murid ke arah sikap yang positif dan menghindarkan gejala disiplin yang akhirnya dapat mengurangkan kadar indeks jenayah.

Untuk makluman Ahli Yang Berhormat, Pelan strategik pengajian tinggi negara (PSPTN) Fasa 2, telah memberikan penekanan terhadap agenda Pembangunan Holistik Pelajar di Institusi Pengajian Tinggi (IPT) bagi melahirkan graduan IPT yang seimbang dari segi ilmu, keterampilan, akhlak, nilai murni, patriotik dan berdisiplin ke arah pembentukan modal insan negara yang holistik dan berpersonaliti unggul (*towering personality*). Justeru, penekanan pelaksanaan diletakkan dalam konteks kurikulum dan kokurikulum yang merangkumi ilmu praktikal dan ilmu falsafah bagi menyokong pembangunan pelajar secara menyeluruh. Oleh itu, penyelarasan Mata Pelajaran Pengajian Umum (MPU) telah dilaksanakan di semua IPT pada September 2013. Di antara tujuan utama MPU ini dilaksanakan adalah untuk pembinaan Negara Bangsa, penguasaan dan peluasan Kemahiran Insaniah, pengukuhan dan peluasan pengetahuan elemen kemalaysiaan serta pengaplikasian Kemahiran Insaniah.

Untuk makluman Ahli Yang Berhormat, usaha-usaha pembangunan sahsiah pelajar telah diterapkan di dalam pembangunan modul pengajian untuk setiap program akademik. Antara kursus-kursus yang memberikan penekanan di dalam pembangunan sahsiah adalah kursus-kursus Pengajian Umum seperti Tamadun Islam dan Tamadun Asia (TITAS), Hubungan Etnik dan Pengajian Malaysia. Kursus-kursus tersebut telah mula diperkenalkan sejak tahun 1998 dan diperkenalkan secara berperingkat telah dijadikan sebagai mata pelajaran wajib di semua IPTA.

**PEMBERITAHUAN PERTANYAAN
DEWAN RAKYAT**

PERTANYAAN : BAGI JAWAB LISAN

**DARIPADA : TUAN HAJI AHMAD NAZLAN BIN IDRIS
[JERANTUT]**

TARIKH : 16 JUN 2014(ISNIN)

SOALAN : 64

Tuan Haji Ahmad Nazlan bin Idris [Jerantut] minta**MENTERI
PENGANGKUTAN** menyatakan adakah Kerajaan berhasrat untuk meningkatkan kadar ketelusan cahaya pada cermin depan dan sisi kenderaan persendirian di Malaysia memandangkan perubahan peningkatan suhu yang ketara.

JAWAPAN

Tuan Yang di-Pertua,

Kerajaan melalui Kementerian Pengangkutan dan Jabatan Pengangkutan Jalan (JPJ) sedang dalam proses untuk mengkaji semula tahap ketelusan cahaya (*Visible Light Transmittance* – VLT) yang dibenarkan digunakan bagi cermin kenderaan. Inisiatif ini diambil mengambilkira maklumbalas yang diberikan oleh orang ramai terhadap keperluan penggunaan cermin gelap atas alasan-alasan berikut:

- (i) cuaca panas di negara kita dan ditambah dengan masalah pemanasan global serta kesesakan lalu lintas;
- (ii) kejadian pecah kenderaan terutamanya kenderaan jenis MPV berikutan barang yang dibawa mudah dilihat dari luar;
- (iii) peraturan sedia ada adalah bertentangan dengan amalan/praktis di negara-negara luar.

Tuan Yang di-Pertua,

Susulan daripada perkara ini, satu bengkel telah diadakan pada 2 dan 3 Jun 2014 yang melibatkan pelbagai pihak yang berkepentingan iaitu agensi Kerajaan, pemain industri, badan bukan Kerajaan dan ahli akademik. Bengkel ini adalah merupakan suatu bentuk engagement oleh Kerajaan dalam memastikan semua aspek iaitu penguatkuasaan, keselamatan

jenayah dan kepenggunaan, diteliti secara menyeluruh sebelum suatu ketetapan dibuat.